



戎事類占卷之八

豫章李克家嗣宗甫輯
同郡許慶之子家甫校

星類二

石氏曰東方青帝其精蒼龍為七宿其象有角有亢有氏有房有心有尾有箕氏胸房腹箕所冀也司春司木司東嶽司東方司鱗蟲三百有六十

東方角宿二星為天關其間天門也其內天庭也故黃道經其中七曜之所行也左角為天田為理主刑其南為太陽道右角為將主兵其北為太陰道蓋天之三門猶房之四表星明大吉歲星犯為饑熒惑犯國衰兵敗犯左角有

赦右角兵起填星犯兵起太白犯羣臣有異謀辰星犯為
小兵守之大水客星犯兵起五穀傷守左角色赤為旱守
右角大水彗星犯色白為兵赤所指破軍出角天下兵亂
星孛於角白為兵赤軍敗入天市兵喪流星犯外國使來
入犯左角兵起雲氣黃白入右角得地赤入左有兵入右
戰勝黑白氣入於右兵將敗

平道二星在角宿間主平道之官熒惑太白守為亂客星
守車駕出行

進賢一星在平道西主卿相舉逸材黃白紫氣貫之草澤
賢人出

天田二星在角北主畿內封域武密曰天子籍田也歲星

守穀稔熒惑守為旱太白守穀傷一曰主兵辰星守為水
災客星守旱蝗

周鼎三星在角宿上主流亾星明國安

天門二星在平星北左角南朝聘待客之所星明萬方歸
化暗則外兵至熒惑入關梁不通太白守有伏兵客星犯
有謀上者一曰邊兵動

平星二星在庫樓北角南主平天下法獄廷尉之象熒惑
犯之兵起有赦

庫樓十星六大星庫也南四星樓也在角宿南一曰天庫
兵車之府也旁十五星三三而聚者柱也中央四小星衡
也芒角兵起星亾臣下逆動則將行實則兵強虛則有反

者動搖戎馬驚一曰天子征伐四夷五柱皆動五將盡行
五柱芒角天下兵盡合庫中星不具兵半出皆不見兵悉
出天子自將庫中無星天下皆反歲星犯主兵熒惑犯爲
兵旱月入庫樓爲兵彗孛入兵饑客星入夷兵起流星入
兵盡出赤雲氣入內外不安天庫生角有兵

南門二星在庫樓南天之外門也主守兵禁星明則遠方
來貢暗則夷叛中有小星兵動客彗守之兵起

亢宿四星爲天子內朝總攝天下奏事聽訟理獄錄功一
曰䟽廟主疾疫不見則穀傷糴貴月犯左爲水右爲兵歲
星守有兵熒惑守久民憂多雨水又爲兵填星犯穀傷民
亾守之有兵太白犯國亾民災逆行爲兵亂守之有水旱

災辰星犯爲水又爲大兵守之米貴民疾歲旱盜起客星
犯國不安色赤爲兵旱黃爲土功守之穀傷黑民流彗孛
國災出則有水兵疫臣叛星孛犯國危爲水爲兵入則民
流出則其國饑流星入外國使來穀熟出爲天子遣使赦
令出雲氣犯色蒼民疫白爲土功黑水赤兵一云白民瘡
疾黃土功

大角一星在攝提間天王坐也又爲天棟正經紀也光明
潤澤爲吉青爲憂赤爲兵白爲喪黑爲疾色黃而靜民安
五星犯臣謀主有兵太白守爲兵彗星出其分主更改或
爲兵孛星犯爲兵客星犯守臣謀主流星犯邊兵起一曰
流星觸破之兵四合國有急

攝提六星左右各三直斗杓南主建時節伺機祥其星為楯以夾擁帝坐主九卿其形如鼎足常東向北向則天子失位移徙則近戚有謀主者移其處兵即起熒惑太白守兵起天下更主彗孛入主自將兵流星入有兵起有使者出赤雲氣入為兵九卿憂

折威七星在亢南主斬殺斷軍獄五星犯將軍叛彗孛犯邊將死雲氣犯蒼白兵亂赤臣叛主黃白為和親

頓頑二星在折威東南主考囚情狀察詐偽星明小吉

陽門二星在庫樓東北主守隘塞禦外寇星暗則四夷犯邊動搖移徙則邊地有變五星入五兵藏彗孛守外夷犯塞兵起赤雲氣入主用兵

氏宿四星為天子舍室后妃之府休解之房前二星適也後二星妾也又為天根主疫其星不見或移動則禍亂生將有動搖之事月犯左右郎將有誅一曰有兵盜犯右星主水掩之有陰謀將相當之歲星犯有赦逆行為兵熒惑犯臣僭上大將軍憂填星犯左右郎將有誅畱舍天下有兵太白犯郎將誅入其分疾疫或云犯之拜將乘右星水災辰星犯貴臣暴憂守之為水為旱為兵乘左星天子自將客星犯邊兵起後宮亂五十日不去有刺客彗星犯有大赦羅貴入有小兵孛星犯羅貴出則有赦入為小兵一曰彗孛犯暴兵起雲氣入黃為土功黑主水赤為兵蒼白為疾疫

天乳一星在氐東北當赤道中明則甘露降

招搖一星在梗河北主北兵芒角變動則兵大行明則兵起若與棟星梗河北斗相直則北方當來受命中國動則近臣恣離次則庫兵發色赤為兵黑為軍破彗星犯北邊兵動出其分夷兵大起孛犯蠻夷亂客星出蠻夷來貢北地有兵喪流星出有兵雲氣犯色赤內兵亂色黃兵罷漢志云斗杓端有兩星一內為矛招搖一外為盾天蓬彗矛盾動搖角大兵起

梗河三星在帝席北天矛也一曰天鋒主北邊兵又主喪故其變動應以兵喪其星與玄戈相向則兵大起星亾國有兵謀彗星犯之北兵敗客星入兵出陰陽不和一云北

兵侵中國流星出為兵赤雲氣犯兵敗蒼白將死

帝席三星在大角北主宴獻酬酢彗犯主憂有亂兵

亢池六星在亢宿北亢舟也池水也主渡水往來送迎微細凶散則天下不通移動關津有變

陣車三星在氐角騎官東北革車也太白熒惑守之車騎滿野內兵無禁

騎官二十七星在氐南天子虎賁也主宿衛星眾天下安稀則騎士叛不見兵起散出天下兵亂動搖芒角兵大起五星犯為兵客星守將出有憂士卒發流星入兵起色蒼白將死

車騎三星在騎官南總車騎軍將部陣行列變色動搖則

兵行不見兵大起太白熒惑客星犯之大兵起天下亂
將軍一星騎將也在騎官東南端總領車騎軍將部陣行
列微小將弱動搖兵外行太白熒惑客星犯之大兵出天
下亂

天輻二星在房西騎陣旁斜列主乘輿五星客彗犯之則
輦轂有變

房宿四星為明堂天子布政之宮也亦四輔也下第一星
上將也次次將也次次相也上星上相也南二星君位北
二星夫人位又為四表中為天衢為天關黃道之所經也
南間曰陽環其南曰太陽北間曰陰環其北曰太陰七曜
由乎天衢則天下和平由陽道則旱喪由陰道則水兵亦

曰天駟為天馬主車駕南星曰左驂次左服次右服次右
驂亦曰天廐又主開閉為蓄藏之所由星明則王者明驂
大則兵起星離則民流左驂服亾則東南方不可舉兵右
亾則西北不可舉兵太陰犯陽道為旱陰道為雨中道歲
稔歲星犯更政令又為兵為饑民流熒惑犯馬貴色赤為
兵黑將相災白芒火災守十日勾巳者臣叛填星犯女主
憂勾巳相有誅守之土功興一曰旱兵太白犯四邊合從
守之為土功出入霜雨不時辰星犯有殃守之水災一云
北兵起將軍為亂客星犯歷陽道為旱陰道為水國空民
饑色白有兵亂入為糴貴彗星犯國危人亂其分惡之孛
星犯有兵民饑國災蒼白氣出將相憂

鈞鈴二星在房北房之鈴鍵天之管籥房鈞鈴間有星及
踈拆則地動河清歲星守為饑去其宿三寸王失政近臣
起亂客星流星犯王有奔馬之敗

鍵閉一星在房東北主關籥明吉暗則宮門不禁太白犯
將相憂客星守道路阻兵起一云兵滿野

罰三星在東咸正西主受金罰贖南北列曲而斜列則刑
罰不中

東咸西咸各四星東咸在心北西咸在房西北日月五星
之道為房之戶以防淫泆也東咸上近鈞鈴則有賊臣害
王者西咸近上則有言讖緯人為害者月五星犯之有陰
謀民饑熒惑犯臣謀上與太白同犯兵起歲星填星犯有

陰謀

日一星在房中道前太陽之精主昭明令德明大則君有
德令月犯下謀上歲星守王得忠臣陰陽和四夷賓客星
彗星犯主失位

從官一星在房宿西南主疾病巫醫明大則巫者擅權彗
孛犯巫臣作亂

心宿三星天王正位也中星曰明堂天子位為大辰主天
下之賞罰前星為太子後星為庶子星直則王失勢天下
變動心星見祥搖動則兵離民流太陰犯大臣憂出心大
星北國旱出南君憂兵起熒惑犯為饑為民流守星南為
水北為旱逆行大臣亂太白犯糴貴將軍憂有水災不出

一年有大兵辰星犯明堂大臣當之在陽為燕在陰為塞
北不則地動大雨守之為水為盜客星犯為旱守之為火
災舍之糴貴民饑彗星犯大臣相疑守之而出為蝗饑又
曰為兵星孛其分有兵喪民流流星犯臣叛入之外國使
來色青為兵為憂白雲氣入亂臣在側

積卒十二星在房心西南五營軍士之象主衛士掃除不
祥星小吉明則有兵動搖朝廷起兵芒角有聚兵事一星
亾兵少出二星亾兵半出三星亾兵盡出星俱亾則國亾
五星守兵起彗星客星守禁兵大出天子自將青赤雲氣
犯之為大臣持政欲論兵事

尾宿九星為天子後宮亦主后妃之位上第一星后也次

三星夫人次星嬪妾也亦為九子太陰犯之臣不和將有
憂歲星犯穀貴守之旱火災熒惑犯有兵留二十日水災
留三月客兵聚入之人相食又云宮內亂填星入為兵饑
盜賊太白犯入大臣起兵久留為水災出入舍守糴貴兵
起失行軍破城亾辰星犯守為水災民疾後宮有罪者兵
起客星出則為風為水兵罷民饑多彗星犯兵起宮門
多土功出入貴臣誅有水災孛犯多土功出為大水民饑
雲氣入色青外國來降出則臣有亂赤氣入有使來言兵
黑氣入有諸侯客來

神宮一星在尾宿第三星旁解衣之內室也與尾同占明
大芒角內亂

天江四星在尾宿北主太陰明動為水兵起民以水饑星不具則津梁不通參差則馬貴中河而居則兵起如流沙人死如亂麻月犯為兵為臣強河津不通熒惑犯大旱守之有立主太白犯暴水彗星犯為大兵客星入河津不通流星犯為水為饑赤雲氣犯車騎出青為多水黃白天子用事兵起入則兵罷

傳說一星在尾後河中主章祝官也一曰後宮女巫也司天王之內祭祀以祈子孫明大則吉左氏傳天策焯焯即此星也

魚一星在尾後河中主陰事知雲雨之期居河東旁近箕為常中河而居天下大水津道塞兵起明大則河海水溢

動搖則大水暴出熒惑犯其陽為旱陰為水填星守為旱赤雲氣犯出兵起將憂入兵罷黃白氣出兵起

龜五星在尾南主卜以占吉凶明潤吉不居河中川水暴至星亾赤地千里熒惑犯為旱守為火一曰兵起外守之兵罷入守之大水客星入為水憂流星出色赤黃為兵青黑為水

箕宿四星為後宮妃后之府亦曰天津一曰天雞主八風主口舌主蠻夷胡貉故蠻胡將動先表箕焉星明大穀熟踈暗世亂無君蠻夷不服動則蠻夷有使來一云動則不出二日大風不正為兵離徙天下不安中星動亦然糴貴移入河國災人相食凡日月宿在箕壁翼軫者皆為風起

舌動三日有大風月犯多風糴貴為旱歲星入歲熟在箕
南為旱在北為有年守之多惡風糴貴民饑死熒惑犯地
動入為旱久守為水填星守有水守九十日人流兵起蝗
太白犯女主喜入則有赦出為土功糴貴守之為旱為風
民疾出入留移五穀不登多蝗辰星犯有赦守則為旱客
星入犯有土功民流守之為饑色赤為兵守其北小熟東
大熟南小饑西大饑出其分民饑夫妻有棄者一云守之
秋冬水災流星犯大臣叛彗星犯守東夷自滅出則為旱
為兵北方亂孛犯為外夷亂糴貴守之外夷災出則穀貴
民死流亾入則多風雨色黃外夷來貢雲氣出色蒼白國
災除入則蠻夷來見出而色黃有使者出箕口歛為雨開

為多風少雨

糠一星在箕舌前杵西北明則豐熟暗則民饑流亾
杵三星在箕南主給庖春明小吉明動天下有兵軍糧急
人失釜甑縱則豐橫則大饑移徙民失業不具若亾則歲
荒人相食客星犯守歲饑彗孛犯天下有急兵

步天歌

角兩星南北正直著中有平道上天田總是黑

星兩相連別有一鳥名進賢平道右畔獨淵然最上三星
周鼎形角下天門左平星雙雙橫於庫樓上庫樓十星屈
曲明樓中五柱十五星三三相聚鼎之形其中四星別名
衡南門樓外兩星橫 亢四星恰似彎弓狀大角一星直
上明折威七子亢下橫左右攝提星三三三三相似如鼎

形折威下左頓頑星兩箇斜安黃色精頑下二星號陽門
色若頓頑直下存 氏四星似斗側量米天乳氏上黑一
星世人不識稱無名一箇招搖梗河上梗河橫列三星狀
帝席三黑河之西亢池六星近攝提氏下衆星騎官出騎
官之衆二十七三三相連十欠一陣車氏下騎官次騎官
下三車騎位天輻兩星在陣旁將軍陣裏振威霜 房四
星直下主明堂鍵閉一黃斜向上鈎鈐兩箇近其旁罰有
三星值鍵上兩咸夾罰似房狀房西一星號爲日從官兩
星日下出 心三星中央色最深下頭積卒共十二三三
相聚心下是 尾九星如鈎蒼龍尾下頭五點號龜星尾
上天江四橫是尾東一箇名傳說傳說東畔一魚子龜西
一室是神宮所以列在后妃中 箕四星形狀如簸箕箕
下三星名木杵箕前一點是糠粃

戎事類占卷之八終

戎事類占卷之九

豫章李克家嗣宗甫輯
同郡許慶之子家甫校

星類三

石氏曰北方黑帝其精玄武為七宿有龜蛇蟠結之象牛
蛇象女龜象虛危室壁皆龜蛇蟠糾之象司冬司水司北
嶽司北方司介蟲三百有六十

北方南斗六星天之賞祿府主天子壽筭為宰相爵祿之
位傳曰天廟也丞相太宰之位褒賢進士稟受爵祿又主
兵一曰天機南二星魁天梁也中央二星天相也北二星
天府庭也又謂南星者魁也北星者杓也第一星曰北宗

一曰天關一曰鐵鑽石申曰魁第一星主吳二會稽三丹陽四豫章五廬江六九江星不明則大小失次芒角動搖國失忠臣兵起民愁月犯將臣黜風雨不時入則趙魏有兵歲星犯有赦久守水災穀貴守及百日兵用熒惑犯有赦破軍殺將火災入二十日糴貴四十日有德令守之為兵盜久守災甚填星犯為亂入則失地逆行地動守之大臣叛又曰逆行先水後旱守之國多義士太白犯有兵臣叛畱守破軍殺將辰星犯水穀不成有兵守之兵喪客星犯兵起國亂入則諸侯相攻多盜大旱宮廟火穀貴彗星犯國王憂出則其分有謀又為水災宮中火下謀上有亂兵入則為火大臣叛季犯入下謀上有亂兵出則為兵為

疾國憂流星入蠻夷來貢雲氣入蒼白多風赤旱出有兵起宮廟火入有雨赤氣兵

建六星在南斗魁東北臨黃道一曰天旗天之都關為謀事為天鼓為天馬南二星天庫也中二星市也鐵鑽也上一二星為旗跗斗建之間三光道也主司七曜行度得失十一月甲子天正冬至大曆所起宿也星動人勞役月犯臣更天子法掩之有降兵月與五星犯之大臣相譖有謀亦為關梁不通大水歲星守為旱糴貴死者眾諸侯有謀入則有兵熒惑守糴貴入則關梁不通馬貴守旗跗三十日有兵填星守王者有謀太白守外國使來辰星守為水災米貴多病客星守道路不通多盜流星入下有謀

天弁九星在建星北市官之長主列肆闖市藉之事以知市珍也彗客犯糴貴久守囚徒起兵

天籥八星在南斗杓第二星西主開閉門戶明吉不備則關籥無禁客星彗星守關梁閉塞

農丈人一星在南斗西南老農主稼穡者又主先農農正官星明歲豐暗則民失業移徙歲饑

鼈十四星在南斗南主水族不居漢中川有易者熒惑守為旱辰星守為火客星守為水流星出色青黑為水黃為旱雲氣占同

天淵十星在鼈東南九坎間一曰天池一曰天泉一曰天海又名太陰王灌溉溝渠五星守大水河決彗星守川溢

傷人

狗國四星在建星東南主三韓鮮卑烏桓獫狁沃且之屬星不具天下有盜不明則安明則邊寇起月犯烏桓鮮卑國亂熒惑守外夷兵起太白守鮮卑受攻客星守有大盜其王來中國

天雞二星在斗西一云狗國北主異鳥一曰主候時熒惑舍為旱犯為兵熒惑太白守兵大起填星犯民流亾客星犯水旱失時入為大水

狗二星在南斗魁前主吠守以不居常處為災客星入多土功北邊饑守之守禦之臣作亂

牛宿六星天之關梁主犧牲事其北二星一曰卽路一曰

聚火又曰上一星主道路次二星主關梁次三星主南越
星暗小關梁不通移入河中天下大亂曲則兵災吳越饑
月犯有水牛多死其國有憂歲星入犯則諸侯失期畱守
則牛多疫五穀傷逆行宮中有火熒惑犯臣謀主守則穀
不成兵起太白犯諸侯不通守則國有兵起入則為兵謀
辰星犯敗軍殺將臣謀主客星犯守牛馬貴越地起兵彗
星犯吳分兵起出為糴貴牛死孛犯改元易號糴貴牛多
死吳越兵起下當有自立者流星犯春夏穀熟秋冬穀貴
雲氣蒼白橫貫有兵喪赤亦為兵

天田九星在牛下西南天子畿內之田也其占與角北天
田同

九坎九星在牽牛南主溝渠導引泉源疏瀉盈溢又主水
旱星明為水災微小吉月暈為水五星犯水溢客星入天
下憂雲氣入青為旱黑為水溢

羅堰三星在牽牛東拒馬也主隄塘壅蓄水源以灌溉也
星明大則水泛溢

天桴四星在牽牛東北橫列鼓桴也主漏刻暗則刻漏失
時動搖則軍鼓用前近河鼓若桴鼓相直皆為桴鼓用太
白熒惑守兵鼓起客星犯刻漏失時

河鼓三星在牽牛西北天鼓也蓋天子及將軍鼓也一曰
三鼓主天子三軍中央大星為大將軍左星為左將軍右
星為右將軍左星南星也所以備關梁而拒難也設守險

阻知謀徵也鼓欲正直而明色黃光澤將吉不正為兵憂
星怒則馬貴動則兵起曲則將失計奪勢有芒角將軍凶
猛象也動搖差度亂兵起月犯軍敗亾五星犯兵起彗星
客星犯將軍被戮流星犯諸侯作亂黃白雲氣入天子喜
赤兵起出則戰勝黑將死青氣入將憂出則禍除

左旗九星在河鼓左旁右旗九星在牽牛北河鼓西南天
之鼓旌旗表也主聲音設險知敵謀旗星明大將吉不明
將憂動搖失色出兵兵敗動搖而舒者大將出隨旗擊之
勝一曰星色暗急備兵星不正國受兵五星犯守兵起

漸臺四星在織女東南臨水之臺也主畧漏律呂事
輦道五星在織女西主王者游嬉之道漢輦道通南北宮

其象也動搖踈圻不見天子戒出游有兵變太白熒惑守
之御路兵起

織女三星在天紀東端河北天女也主果蓏絲帛珍寶星
亾兵起女子為侯熒惑守兵起客星入色青為饑赤為兵
黃為旱黑為水流星入有水盜雲氣入蒼白女子憂赤則
女子兵死

須女四星天之少府賤妾之稱婦職之卑者也主布帛裁
製嫁娶月犯有女惑有兵不戰而降又曰將軍死歲星守
多水國饑喪糴貴熒惑犯民大災守之土人不安五穀不
熟又為兵入則糴貴填星犯守有苛政山水出壞民舍留
五十日民流亾太白犯兵起留守軍發辰星犯國饑民疾

守之天下水有赦南地火北地水又兵起客星犯兵起女人為亂守之諸侯有兵江淮不通糴貴彗星犯兵起女為亂出為兵亂有水災米鹽貴星孛其分兵起女為亂赤雲氣入婦人多病歿

十二國十六星在牛女南近九坎各分土居列國之象九坎之東一星曰齊齊北二星曰趙趙北一星曰鄭鄭北一星曰越越東二星曰周周東南北列二星曰秦秦南二星曰代代西一星曰晉晉北一星曰韓韓北一星曰魏魏西一星曰楚楚南一星曰燕有變動各以其國占之陶隱居曰越星在婺女南鄭一星在越北趙二星在鄭南周二星在越東楚一星在魏西南燕一星在楚南韓一星在晉北

晉一星在代北代二星在秦南齊一星在燕東

離珠五星在須女北須女之藏府女子之星也又曰主天子旒珠后夫人環珮去陽早去陰潦

匏瓜五星一作瓠瓜在離珠北天子果園也不具或動搖為盜客星守山谷多水犯之有游兵不戰蒼白雲氣入果不可食青為天子攻城邑

敗瓜五星在匏瓜星南主修瓜果之職與匏瓜同占

天津九星在虛宿北橫河中一曰天漢一曰天江主四瀆天津梁所以度神通四方也一星不備津梁不通明正吉不明則兵起參差馬貴明大而動兵亂起大則水災移則水溢若從河則水賊稱王彗孛犯津敗道路有賊客星犯橋

梁不修守之水道不通船貴流星出必有使出隨分野占赤雲氣入為旱黑為大水蒼為水

奚仲四星在天津北主帝車之官明盛芒角兵起變動車駕不安彗出將反太白熒惑守為兵

扶筐七星為盛桑之器主勸蠶也一曰供奉后與夫人之親蠶明吉暗凶彗星犯將叛

虛宿二星為虛堂冢宰之官也主死喪哭泣又主北方邑居廟堂祭祀祝禱事月犯宗廟兵動國憂將死歲星犯民饑與填星同守水旱不時熒惑犯流血滿野守為旱民饑軍叛入為火災功成見逐或勾已大人戰不利填星犯有急令行疾有客兵入則有赦殺不成守之風雨不時為旱

大人欲危宗廟有客兵太白犯下多孤寡兵喪出則政急守之臣叛君辰星犯春秋有水守亦為水災在東為春水南為夏水西為秋水北冬有雷雨水客星犯羅貴守兵起近期一年遠則二年有哭泣事出為兵喪彗星犯國凶有叛臣出為野戰流血出入有兵起芒彗所指國必凶星孛其宿有哭泣事出則為野戰流血國有叛臣雲氣入黃為喜蒼為哭赤火黑水

司命二星在虛北主舉過行罰滅不祥又主死凶

司祿二星在司命北主增年延德掌功賞食料官爵

司危二星在司祿北主矯失正下樓閣臺榭死喪流凶

司非二星在司危北主司候內外察愆尤主過失乾象新

書命祿危非八星主天子已下壽命爵祿安危是非之事
明大為災居常吉

哭二星在虛南主哭泣死喪

泣二星在哭星東與哭同占

天壘城十三星在泣南園如大錢形若貫索主鬼方北邊
丁零之類所以候興敗存亡明大變動夷兵起熒惑入守
夷人犯塞客星入北方侵赤雲氣掩之北方驚滅多疫

敗曰四星在虛危南兩兩相對主敗亡災害彗星犯民饑
流亡

離瑜三星在十二國秦代東敗曰西離圭衣也瑜玉飾皆
婦人見舅姑衣服也

危宿三星在天津東南為天子宗廟祭祀又為天子土功
又主天府天市駕屋受藏之事不明客有誅土功興動或
暗營宮室有兵事月犯宮殿陷臣叛來歲糴貴歲星犯守
為兵役徭多土功有哭泣事又多盜熒惑犯有赦守之人
多疾兵動諸侯謀叛宮中火災守三十日東兵起歲旱近
臣叛入為兵有變更之令填星守為旱民疾土功興國大
戰犯之兵喪出入畱舍國土地有流血入則大亂賊臣起
太白犯為兵一曰無兵兵起有兵兵罷五穀不成多火災
守之將憂又為旱為火舍之有急事辰星犯國多災守之
臣下叛

墳星四星附危下墳墓狀主山林喪葬之事

虛梁四星在蓋屋南一曰危南主園陵寢廟鬼神之神金
火守入犯兵災火起

蓋屋二星在危宿南主治宮室五星犯兵起彗孛犯守兵
災尤甚

天錢十星在北落西北主錢帛府庫金火守兵盜起

人五星在虛北車府東如人形一曰主萬民柔遠能邇又
曰卧星主夜行以防淫佚星不見庶人作亂天下兵起

杵三星在人星東主軍糧正直下曰則吉不相當則軍糧
絕縱則吉橫則凶

曰四星在杵星下杵白不明則民饑覆則歲饑仰則歲熟
彗星犯民饑兵起天下急

車府七星在天津東近河東西列主車府之官又主賓客
之館明大芒角兵亂動搖兵車大出熒惑守兵動彗客犯
兵車出

造父五星在傳舍南河中御官也一曰司馬伯樂主御營
馬廐馬乘轡勒移處兵起馬貴彗客入守兵起廐馬出

鈎九星在造父西河中如鈎狀星直則地動

營室二星天子之宮一曰玄宮一曰清廟又為軍糧之府
主土功事一曰室一星為天子宫一星為太廟為王者三
軍之廩故置羽林以衛又為離宮閣道故有離宮六星在
其側一曰定室詩曰定之方中也歲星犯有急而為兵熒
惑犯歲不登守之有小災為旱為火羅貴逆行守之臣謀

叛填星犯為兵守之天下不安人主徙宮關梁不通太白犯五寸許天子政令不行守則兵大忌之以赦今解留六十日將或入則有暴兵辰星犯為水客星犯入天子有兵事軍饑將離外兵來出於室兵先起者敗彗星出占同或犯之則弱不能戰出入犯之則先起兵者勝一曰出室為大水孛犯或出入先起兵者勝出有小災後宮亂一曰孛出其分有兵喪道藏所載室專主兵流星犯軍之糧在春夏將軍貶秋冬水溢乙巳占曰流星出入色黃潤軍糧豐赤雲氣入為兵民疫

離宮六星兩兩相對分布室壁之間天子之別宮也主隱藏休息之所太白熒惑入兵起

雷電六星在室南明動則雷電作

土功吏二星在壁宿南一曰在危東北主營造宮室起土之官

騰蛇二十二星在室宿北主水蟲居河濱移向南兵起大旱向北大水彗孛犯水道不通客星守雨水為災

壘壁陣十二星在羽林北橫列室壁之南其中四星兩端各四星羽林之垣壘主天軍營星明國安移動兵起不見兵盡出將或五星入犯皆主兵太白辰星尤甚客星入兵大起將吏憂

羽林軍四十五星三三而聚散出壘壁之南東西布列北第一行主天軍軍騎翼衛之象星眾則國安稀則兵動羽

林中無星則兵盡出天下亂月犯兵起歲星入諸侯悉發兵臣下謀叛必敗伏誅太白入兵起填星入大水五星入為兵熒惑太白經過天子以兵自定熒惑入而芒赤與兵者凶客星入色赤為臣叛

斧鉞三星在八魁西北芟刈之具也主斬芻藁以飼牛馬主行誅拒難斬伐奸謀明大用兵將憂暗則不用移動兵起太白入將誅客犯外兵被擒士卒死傷外國降色青憂赤兵黃白吉

北落師門一星在羽林軍南北者宿在北方落者天軍之蕃落也師門猶軍門長安城北門曰北落門象此也主非常以候兵星明大兵精微小兵弱芒角大兵起凶不見天

下有兵大將出人主憂熒惑入兵弱不可用客星犯光芒相及為兵大將死守之邊人入塞流星出而色黃天子使出色赤或犯之皆為兵起雲氣入蒼白為疾疫赤為兵黑邊將死

天網一星在北落西南主武帳宮舍天子游獵所會客彗入為兵起一云義兵

八魁九星在斧鉞東南主捕張禽獸之官也明盛兵起客彗入多盜賊兵起太白熒惑入守占同

壁宿二星主文章天下圖書之秘府月犯國有憂為饑衛地有兵歲星犯水傷五穀久守或凌犯勾巳有兵起熒惑犯衛地憂守之國旱民饑太白犯一二寸許則諸侯用命

守之文武並用一曰有軍不戰一曰有兵喪一曰水災多
風雨一曰犯之多火災辰星犯國有蓋藏保分之事一曰
其分有兵喪奸臣有謀逆行守之橋梁不通彗星犯為兵
為火一曰大水民流孛犯為兵有火水災赤雲氣入為兵
黑其下國破黃則外國貢獻一曰天下有烈士立
天廐十星在東壁之北主馬之官若今驛亭也主傳令置
驛逐漏馳騫謂其急疾與晷漏競馳也月犯兵馬歸彗星
入馬廐焚客星入馬出行流星入天下有驚

土工二星在壁宿南主營造起土之官也

霹靂五星在雲雨北雷電南主陽氣大盛擊碎萬物

雲雨四星在霹靂南主雨澤成萬物星明則多雨水辰星

守有大水一占主陰謀殺事

鐵鑽五星在天倉西南刈具也主斬芻飼牛馬

步天歌 斗六星其狀似北斗魁上建星三相對天弁建

上三三九斗下圓安十四星雖然名鼈貫索形天雞建背

雙黑星天籥柄前八黃精狗國四方雞下生天淵十星鼈

東邊更有兩狗斗魁前農家丈人斗下眠天淵十黃狗星

玄 牛六星近在河岸頭頭上雖然有兩角腹下從來欠

一脚牛下九星是天田田下三三九坎連牛上直建三河

鼓鼓上三星號織女更有四黃名天桴河鼓直下如連珠

左旗右旗各九星河鼓兩畔左邊明羅堰三鳥牛東居漸

臺四星似口形輦道西足連五星輦道漸臺在何許欲得

見時近織女 女四星如箕王嫁娶十二諸國在下陳先
從越國向東論東西兩周次二秦雍州南下雙雁門代國
西向一晉伸韓魏各一晉北輪楚之一國魏西屯楚城南
畔獨燕軍燕西一郡是齊鄰齊北兩足平原君欲知鄭在
越下存十六黃星細區分五箇離珠女上星敗瓜珠上匏
瓜生兩箇各五匏瓜明天津九箇彈弓形兩星入牛河中
橫四箇奚仲天津上七箇仲側扶筐星 虛上下各一如
連珠命祿危非虛上呈雙雙相比八烏星虛危之下哭泣
星哭泣雙雙下壘城天壘團圓十三星敗曰四星城下橫
曰西三箇離喻明 危三星不直舊先知危上五星號人
星人下三四杵曰形人上七烏號車府府上天鈎九皇晶

鈎下五鴉字造父危下四星號墳墓墓下四星斜虛梁十
箇天錢梁下黃墓旁兩星能益屋身着黑衣危下宿 室
兩星上有離宮出遶室三雙有六星下頭六箇雷電形壘
壁陣次十二 至十二兩頭大似井陣下分布羽林軍四十
五卒三爲羣軍西四下多難論仔細歷歷有區分三粒黃
金名鐵鉞一夥珍珠北落門門東八魁九箇子門西一箇
天網是電旁兩黑土公吏騰蛇室上二十二 壁兩星下
頭是霹靂土工一雙壁下黑霹靂五星橫著行雲雨次之
曰四方壁上天廡十圓黃鐵鑽五星羽林旁

戎事類占卷之九終

戎事類占卷之十

豫章李克家嗣宗甫輯
同郡許慶之子家甫校

星類四

石氏曰西方白帝其精白虎為七宿奎象白虎婁胃昴象
虎三子也畢象虎觜參象麟觜首參身也司秋司金司西
嶽司西海司西方司毛蟲三百有六十

西方奎宿十六星天之武庫一曰天豕一曰封豕主以兵
禁暴又主溝瀆西南大星曰天豕目亦曰大將明吉明大
臣干命若有稱王於山谷者動則兵大出光焰近臣謀叛
月犯其分亂歲星犯近臣為逆守之人民饑盜起久守北

兵降守二十日以上兵起魯地逆行守之君好兵民流亾
熒惑犯環繞三十日以上將相凶大水民流守二十日以
上魯地有兵守百日以上多盜填星入犯吳越有兵一曰
齊魯一曰兵喪出入水泉溢太白犯大水有兵霜殺物入
則外兵入國晝見將相死辰星犯江河決有兵為旱為火
守之王者憂兵旱客星犯有溝瀆事守則王者有憂軍敗
賊臣在側入之破軍殺將舍留不去人饑彗犯為饑為兵
喪出則有水災星孛其下兵出民饑出則西北有兵起流
星入犯破軍殺將一曰流星出入色赤如火光作聲為彗
孛用一曰入則有聚眾事赤雲氣入犯為兵
外屏七星在奎南主障蔽臭穢

天溷七星在外屏南主天厠養豢之所一曰天之厠溷也
暗則人不安

土司空一星在奎南一曰天倉主土事凡營城邑浚溝洫
修隄防則議其利建其功四方小大功課歲盡則奏其殿
最而行賞罰彗客犯水旱民流兵大起

軍南門一星在天大將軍南天大將軍之南門也主誰何
出入星不明外國叛不見天下亂動搖則兵起明則遠方
來貢

附路一星在閣道南旁別道也主太僕主禦風雨芒角則
車騎在野一曰附路正馬則車騎滿野星亾有道路之變
不見則兵起太白熒惑入兵起彗孛犯道路不通

閣道六星在王良前飛道也從紫宮至河神所乘也一曰王輦閣之道天子游別宮之道也一曰王良旗一曰紫宮旗亦所以爲旌表而不欲其動搖旗星者兵所用也星不見則輦閣不通動搖則宮掖有兵白雲氣入有急事策一星在王良北天子僕也王執策御動搖天子出若移在馬後車騎滿野流星彗孛客星犯之皆爲大兵起天子自將於野近之下有謀亂者

王良五星在奎北居河中天子奉車御官也其四星曰天駟旁一星曰王良亦曰天馬星移則有兵動則車騎滿野馬參差天下安四馬齊行王良王策則天下大亂天子自臨兵王良策馬兵大起一曰爲天橋王禦風雨水道星不

具或客星守之津梁不通與閣道近有江河之變太白熒惑入守爲兵彗客犯爲兵喪天下橋梁不通流星犯大兵將出

婁宿三星爲天獄主苑牧犧牲供給郊祀亦爲興兵聚衆月犯將死民流歲星犯有兵自罷熒惑犯守爲旱爲火穀貴填星犯天子戒邊境不可遠行將兵凶畱舍於婁外國兵來太白犯有聚衆事守之期三十日有兵一曰太白熒惑守宮苑內兵起民饑辰星犯刑罰急多水旱芒角動搖色赤黑者臣下起兵一曰動搖則聚衆兵起星直則有執王命者就聚國不安大饑客星犯爲大兵彗星犯民饑死出則先旱後水穀大貴國有大兵星孛其分兵饑青赤雲

氣入爲兵喪黑爲大水

右更五星在婁西秦爵名主牧師官亦主義禮星不具天下道不通動搖天子私出若與左更俱動則千乘萬騎填道而行太白熒惑犯守山澤兵起

左更五星在婁東亦秦爵名山虞之官主山澤林藪竹木蔬菜之屬亦主仁智占同右更

天大將軍在婁北主武事中央大星天之大將也外小星吏士也明則兵強將勇暗則兵弱將怯動搖兵起大將出小星動搖或不具亦爲兵星亾將死旗直揚者隨所擊勝五星犯守大將憂客星守大將不安軍吏以饑敗流星出兵起大將出入大將憂一曰大將驚出兵大起抵犯則有

大兵來攻星所從來爲發兵處彗出兵大起犯則將死蒼

白雲氣犯多疾赤爲兵出

其星十一

天倉六星在婁宿南倉穀所藏也待邦之用星近而數則歲熟穀聚戶開穰閉穀不登不具則道不通軍絕糧暗或不見歲饑五星犯兵起歲饑倉粟出熒惑太白合守軍破將死熒惑入軍轉粟千里近之天下旱太白犯外國人相食兵起西北辰星守大水客彗犯五穀不成客星入歲饑羅貴流星入色赤爲兵犯之粟以兵出蒼白雲氣入歲饑赤爲兵旱倉廩災

天庾三星在天倉東南主露積占與天倉同

胃宿三星天之厨藏主倉廩五穀府也明則倉廩實暗則

倉空中星衆穀聚星小穀散芒則有兵月犯鄰國有暴兵
天下饑變色將軍凶歲星犯兵起逆行五穀不成國無積
蓄熒惑犯兵亂倉粟出守之旱饑民疫客軍大敗進退環
繞勾已凌犯及百日以上天下倉庫竝空兵起填星犯大
臣爲亂守之無蓄積有德令歲穀大貴若逆行守勾已者
有兵色赤兵起流血辰星犯其分不寧守之有兵國有立
侯巫咸曰爲旱穀不成有急兵客星犯倉廩用守之強臣
擅國穀不熟乘之爲火舍而不去人饑彗星犯兵動臣叛
有水災穀不登星孛其分兵起蒼白雲氣出入犯之以喪
糴粟事青黑爲兵

天廩四星在昴宿南一曰天廩主蓄黍稷以供享祀春秋

所謂御廩也又主賞功掌九穀之要明則國實歲豐月犯
穀貴五星犯歲饑客星犯倉廩空虛流星入色青爲憂赤
爲旱爲火青雲氣入蝗饑民流赤爲旱黑爲水

天困十三星如乙形在胃南倉廩之屬主給御廩染盛暗
則饑五星犯倉廩空虛青白雲氣入歲饑民流亾

大陵八星在胃北亦曰積京主大喪也中星繁諸侯喪民
疫兵起月犯爲兵爲水旱五星入爲水旱兵喪蒼白雲氣
犯天下兵喪赤則人多戰歿

積尸一星在大陵中明則有大喪歿人如山月犯臣叛

天船九星在大陵北河之中天將軍之船也主通濟利涉
石申曰不在漢中兵起津河不通川溢有沒國明則天下

安不明及移徙或小不見天下兵喪五星犯水溢民移居
彗星犯為大水客星犯為水為兵青雲氣入天子憂不可
御船赤為兵船用
積水一星在天船中候水災也明動上行舟船用熒惑犯
有水
昴宿七星天之耳也主西方及獄事又為旄頭北星也又
主喪昴畢間為天街天子出旄頭畢畢以前驅此其義也
黃道所經明則天下牢獄平七星皆黃兵大起一星亾為
兵喪大而數盡動若跳躍者北兵大起一星獨跳躍而動
北兵欲犯邊月犯為饑北主憂天子破北兵變色民流國
亾下有暴兵歲星犯獄空乘之陰國有兵畱守破軍殺將

熒惑犯守為火為旱饑守東齊楚越地有兵守南荆楚有
兵西則兵起秦鄭北則兵起燕趙入則有喜有赦天下無
兵填星犯或出入守之北地為亂畱則大將出征太白入
犯大赦在東六畜傷在西六月有兵又曰守之北兵動將
下獄晝見邊兵起辰星犯北主憂久守為水為兵客星犯
貴人有急北兵大敗讒人在內守之臣叛主兵起彗星犯
大臣為亂出則邊兵起星孛其分臣下亂有邊兵流星出
入犯之夷兵起一曰流星入北方來朝蒼赤雲氣犯民疫
青為水為兵

月一星在昴宿東南瞻餘也主日月之應女主臣下之象
又主死喪之事太白熒惑守之臣下起兵為亂

天阿一星在胃東昴西主察山林妖變五星客彗犯妖言
滿路

天陰五星在畢柄西主從天子弋獵之臣不明為吉明則
禁言泄

芻藁六星在天苑西主積藁一曰天積天子之藏府

天苑十六星在昴畢南如環狀天子養禽獸之苑明則禽
獸牛馬盈五星客彗犯兵起

卷舌六星在昴北主樞機智謀一曰主口舌語言知讒佞
直而動多讒人兵起天下有口舌之害其中星眾兵大起
徙出漢外則天下多妄說五星犯佞人在側

天讒一星在卷舌中主巫醫暗則吉明大動搖兵起

礪石四星在五車星西主百二磨礪鋒刃亦主候伺明則
兵起熒惑入邊兵起守之諸侯發兵客星守為兵

畢宿八星主邊兵弋獵其大星曰天高一曰邊將主四夷
之尉也天官書曰畢為罕車明大則遠人來朝天下安失
色邊兵亂一星亾為兵喪動搖則邊兵起月犯畢大星下
犯上大將死陰國憂入畢口多雨穿畢歲饑盜起失行離
於畢則雨又曰犯北則陰國憂南則陽國憂歲星犯冬多
風雨又曰為水入畢口邊兵起民饑有赦守三十日客兵
起出陽為旱陰為水熒惑犯右角大戰左角小戰入則邊
兵憂守則為饑入畢中有兵兵罷守之天下道路不通填
星犯兵起西北不戰守之兵有降軍一曰土功徃後煩兵

起出入畱舍其野兵起客軍死太白犯右角戰敗將死入
畢口將相為亂諸侯起兵為水五穀不成貫畢倉廩空四
國兵起辰星犯邊地災守之水溢邊兵起守畢口人為亂
客星犯無兵兵起有兵兵罷守之為饑邊兵起出為車馬
急行彗星犯北地為亂星孛其分土功興多徭役色蒼為
饑破軍黃則女為亂白為兵喪黑為水流星犯邊兵大戰
赤色貫之戎兵起蒼白雲氣入歲不收赤為兵旱為火
附耳一星在畢下主聽得失伺愆邪察不祥也星盛則中
國微有盜賊邊候警外國反動則讒佞行兵大起移入畢
讒邪肆志大兵四起歲星犯有兵將相喪太白犯佞臣在
側客星守兵起彗孛犯北夷為寇

天節八星在畢附耳南主使臣持節宣威四方不明則奉
使無狀不見則四方不奉王命熒惑守臣有謀逆太白守
大將出

九州殊口九星在天節南王曉方俗之官通重譯者也又
為水中船舶之市常以十一月候之亾一星一國憂二星
以上天下亂兵起太白熒惑守亦為兵客星入民憂水負
海國不安有兵流星出夷狄災赤色夷狄兵亂

九旂九星在玉井西南南北列主天下兵旗又曰天子之
旗也主司五星之過繞九州導軍進退明靜吉芒動兵起
微暗則有奸人窺伺太白熒惑犯兵騎滿野客星犯諸侯
兵起

天園十三星在天苑南植菜果之處白雲氣犯兵起

參旗九星在參西五車之間一曰天旗一曰天弓一曰天弩
候變禦難星如弓張則兵起明大則邊寇動明小而踈若
直則天下息兵芒角兵大起九星不具有兵或赦五星犯
兵起熒惑守下謀上諸侯起兵一曰有邊兵大白守兵亂
客星守天下憂流星入北地兵起一曰流星出入邊方自
相殘害以日于支占國壬子北狄乙卯東夷丙午南蠻辛
酉西戎或兵災或饑荒應其地雲氣犯色青入自西北兵
來期三年

天高四星在諸王南畢口東北臺榭之高王望八方雲霧
氛氣今仰觀臺也微暗陰陽不和月五星犯水旱不時

天街三星在昴畢間為陰陽之所分七政出入之道街南
為華夏街北為外邦又曰三光之道主伺候關梁中外之
境明則王道正暗不見移徙兵起關梁不通月行天街中
為中平街外讒夫當事不由天街政令不行熒惑守道路
絕歲星居之色赤為殃或大旱太白守兵塞道路六夷旄
頭滅一曰民饑

諸王六星在五車南漢中主察諸侯存亡不明則下叛不
見宗廟危四方兵起

天關一星在五車南亦曰天門日月之所行主邊方主關
閉星明大而動若芒角兵大起與五車合大將出一曰移
徙與五車口合則國門盡閉將不解甲熒惑守臣謀王為

水爲饑太白熒惑守太赦關梁有兵太白入則大亂太白
失行兵起客星犯關市不通又曰諸侯不通民相攻客星
入多盜流星犯天下有急關梁不通民憂多盜黃雲氣犯
四方入貢

五車口五星三柱九星在畢宿北五帝外坐也又五帝之
車舍也主天子五兵又主五穀豐耗一主麻一主麥一主
豆一主黍一主稻西北大星曰天庫主太白秦分及雍州
主豆東北一星曰天獄主辰星燕趙分及幽冀主稻東南
一星曰天倉主歲星魯分徐州衛分并州主麻次東南一
星曰司空主填星楚分荊州主黍次西南一星曰卿主熒
惑魏分益州主麥天文錄曰太白其神令尉辰星其神風

伯歲星其神雨師熒惑其神豐隆填星其神雷公此五車
有變各以所主占之三柱昂足而居一曰天淵亦曰三衆
一曰天休亦曰休格一曰天旂五車欲其均明闊狹有常
星繁則兵大起動搖期三十日車騎發移徙穀貴兵起失
色赤地千里石申曰天庫星不見或中河而居天下多火
人河津絕天倉星不見軍絕食天旂星不見則大風折木
天休動則四國叛一曰休出庫輕騎出休出倉大車出休
格反抵大星天下有兵先起者勝一柱出或不見兵半出
三柱盡出及不見兵亦盡出柱外出一月穀貴三倍出二
月三月以次倍貴柱外出不居兩星間主大水柱倒立戰
車行轉輸千里月犯天庫兵起道不通五星犯爲旱喪犯

庫星為兵起歲星入糴貴熒惑入為火填星入天庫為兵為喪太白入兵大起守五車中國兵所向惛伏辰星入舍為水犯之兵以水潦起客星犯則人勞庚寅日候近之為金車主兵甲寅日候近之為木車主權增價戊寅日候近之為土車主土功丙寅日候近之為火車主旱壬寅日候近之為水車主水溢入之色青為憂赤為兵守天淵有大水守天休左為兵右為喪彗孛犯兵起民流白雲氣入民不安亦為兵起

天潢五星在五車中主河梁津渡星不見則津渡不通月入天潢兵起五星失度留守皆為兵熒惑填星入為大旱為火熒惑舍之牛馬疫為兵客星入為兵留守則有水害
蒼白或黑雲氣入為喪赤為兵

咸池三星在天潢南主陂澤池沼魚鼈鳧雁明大則龍見虎狼為害兵大起星不見河道不通月入為暴兵五星入為兵為旱守之為饑為兵客星入天下大水流星入為喪出則兵起雲氣入赤為旱黑為大水

觜觿三星為三軍之候行軍之藏府葆旅收斂萬物明則軍糧足將得勢動則盜賊行葆旅起暗則不可用兵一曰芒角羣盜起移徙有逐將動搖失色兵亂起歲星犯其分兵起守之下有叛者入則多盜熒惑犯其分有叛者為旱為火為兵起為糴貴入則其下有兵填星入犯為兵其分失地太白犯兵起守之大臣叛辰星犯不可舉兵一曰趙

地水有叛者客星出入其宿赤為兵黑為水彗星犯兵起
出入其分失地民流星孛為兵亂軍破流星入犯有叛者
有破軍雲氣犯赤為兵蒼白為軍憂

司怪四星在井鉞星前主候天地日月星辰變異鳥獸艸
木之妖星明國災不具歷官失職天下多怪

坐旗九星在司怪西北君臣設位之表也

參宿十星一曰參伐一曰天市一曰大辰一曰鈇鉞主斬
刈萬物以助陰陽又為天獄主殺秉威行罰也又主權衡
所以平理也又主邊城為九譯故不欲其動參為白獸之
體其中三星橫列者三將也東北曰左肩主左將西北曰
右肩主右將東南曰左足主後將軍西南曰右足主偏將

軍參應七將中央三小星曰伐天之都尉主鮮卑外國不
欲其明七星皆明大天下兵精伐星明與參等大臣有謀
兵起失色軍散敗芒角動邊有急兵起有斬伐之事一曰
芒角赤耀橫射則三軍動天子自將出征星移客伐主肩
細微天下兵弱左足入玉井中兵起秦有大水左股星亾
東南不可舉兵右股則主西北又曰參足移北為進將出
有功徙南為退將軍失勢月犯貴臣憂兵起民饑犯參伐
偏將死歲星犯水旱不時大疫為饑守之兵起民疫熒惑
犯為兵為內亂秦燕地凶守之為旱為兵四方不寧逆行
入則大饑填星犯有叛臣守之其下國亾奸臣謀逆逆行
畱守兵起太白犯天下發兵守之大人為亂國易政邊兵

大戰辰星犯為水為兵辰星與參出西方為旱逆守兵起
客星入犯國內有斬刈事之邊州失地環繞者邊將有
斬刈事彗星犯邊兵敗君亾遠期三年貫之色白為兵喪
星孛於參君臣俱憂國兵敗流星入犯先起兵者亾一曰
流星出而光潤邊安有赦青雲氣入犯天子起邊城蒼白
為臣亂赤為內兵黃色潤澤大將受賜黑為水災白雲氣
出貫之將歿

玉井四星在參左足下主水泉以給庖厨動搖為憂客星
入為水為喪國失地出則國得地一云將出流星入為大
水

軍井四星在玉井東南軍營之井主給師濟疲乏動搖大

水不見軍之水月犯國中財寶出熒惑入為水兵多歿太
白入兵動民不安客星入憂水害

厠四星在屏星東主溷色黃吉歲豐客星入殺貴彗孛入
歲饑青雲氣入為兵

屏二星一作天屏在軍井南月五星犯為水

天尿一星在厠南色黃則年豐凡變色為蝗為水旱為霜
殺物常以秋分候之星亾不見天下荒星微民多流

步天歌 奎腰細頭尖似破鞋一十六星遶鞋生外屏七

烏奎下橫屏下七星天溷明司空左畔土之精奎上一宿
軍南門河中六箇閣道形附路一星道旁明五箇吐花王
良星良星近上一策明 婁三星不勻近下頭左更右更

烏夾婁天倉六箇婁下頭天庾三星倉東脚婁上十二將
軍侯 胃三星昴足河之次天廩胃下斜四星天困十三
如乙形河中八星名大陵陵北九箇天船明陵中積尸一
箇星積水船中一黑精 昴七星一聚實不少阿西月東
各一星阿下五黃天陰名陰下六烏芻藁營營南十六天
苑形河裏六星名卷舌舌中一點天讒星礪石舌旁斜四
丁 畢恰似爪又八星出附耳畢股一星光天街兩星畢
背旁天節耳下八烏幢畢上橫列六諸王王下四皂天高
星節下團圓九州城畢口斜對五車口車有三柱任縱橫
車中五箇天潢精潢畔咸池三黑星天關一星車脚邊參
旗九箇參車間旗下直建九旂連旂下十三烏天園九旂

天園參脚邊 觜三星相近作參參觜上坐旗直指天尊
卑之位九相連司怪曲立坐旗邊四鴟大近井鉞前 參
總有七星觜相親兩肩雙足三為心伐有三星足裏淡玉
井四星右足陰屏星兩扇井南襟軍井四星屏上吟左足
下四天厠臨厠下一物天尿沉

戎事類占卷之十終

戎事類占卷之十一

豫章李克家嗣宗甫輯
同郡許慶之子家甫校

星類五

石氏曰南方赤帝其精朱鳥為七宿井首鬼目枴喙星頸
張喙翼翮軫尾司馬司火司南嶽司南海司南方司羽蟲
三百有六十

南方東井八星天之南門黃道所經七曜常行其中為天
之亭候主水衡事法令所取平也武密占曰井中為三光
正道五緯留守若經之皆為天下無道不欲明明則大水
鉞一星附井宿前主伺奢淫而斬之明大與井宿齊則用

鉞於大臣月宿其分有風雨月犯將死於兵歲星犯水溢
將軍惡之犯井鉞近臣為亂兵起逆行入井川流壅塞熒
惑犯兵先起者殃又曰天子以水敗入守經旬下有兵守
三十日成勾己角動色赤黑貴人當之百川溢兵起填星
入犯兵起東北在觜而去東井其下亾地太白犯咎在將
久守其分君失政臣為亂辰星犯星進則兵進退則兵退
又曰北兵起歲惡芒角動搖色赤黑為水為兵起客星犯
穀不登彗星犯民讒言其分兵災流星客星黃潤國安赤
黑秦分民流水災蒼黑雲氣入犯民有疾疫黃白潤澤有
客來言水澤事黑氣入為大水常以正月朔日入時候之
井宿上有雲歲多水潦

南河三星與北河夾東井一曰天之關門也主關梁南河
曰南戍一曰南宮一曰陽門一曰越門一曰權星主火兩
河戍間日月五星之常道也河戍動搖中國兵起河星不
具路不通水泛溢月出入兩河間中道民安歲美無兵星
明吉昏昧動搖邊兵起遠人叛月犯為兵為喪為旱為疫
行西南為兵旱入南戍則民疫乘之四方兵起熒惑犯兩
河為兵守三十日以上川溢守南河穀不登守南戍西果
不成在東則有攻戰填星乘南河為旱民憂守之為兵道
不通太白舍三十日川溢一曰有奸謀守兩河為兵起客
星守為旱疫彗孛出為兵守為旱流星出為兵喪邊戍有
憂蒼白雲氣入河道不通出而色青天子兵向諸侯

北河三星北河曰北戍一曰北宮一曰陰門一曰胡門一曰衡星主水動搖胡兵起一曰河星不明四夷交侵五星出入留舍為兵起熒惑從東入北戍九十日有兵一曰出北戍北守之邊將有不請於上而用兵外國者勝填星守兵起若守戍西五穀不實太白舍北戍三十日有內謀守陰門不出百日天下兵悉起辰星守外兵起邊臣有謀留止則兵起四方客星入犯奸人在中入自東兵起期九十日守之為大水流星經兩河間天下有難入為北兵入中國關梁不通蒼白雲氣入犯邊有兵

天罇三星在五諸侯南東井北罇器也主盛饘粥以給貧餒明則歲豐暗則歲惡

五諸侯五星在東井北主斷疑刺舉戒不虞理陰陽察得失亦曰主帝心一曰帝師二曰帝友三曰三公四曰博士五曰太史五者常為帝定疑議星明大潤澤則天下治歲星犯兵起三年熒惑犯大臣叛不成太白犯諸侯興兵亾國客星犯王室亂諸侯亾地秦國殃

積水一星在北河西北所以供酒食之正也不見為災歲星犯民饑熒惑犯為兵為水辰星犯為水旱一曰五星犯守有水災水兵起客星犯兵起大水蒼白雲氣入犯天下有水

積薪一星在積水東北供庖厨之正也星不明五穀不登去積水五尺天下安遠若一文饑荒民流熒惑犯為旱為

兵爲火災赤雲氣入犯爲水災

水府四星在東井西南水官也主隄塘道路梁溝以設隄防之備星明大有水災熒惑入有謀臣辰星入爲水客星入天下大水流星入色青所主之邑大水赤爲旱

水位四星在東井東北主水衡明小吉明大動搖水橫流民以水饑變色失常水災兵起移近北河則國邑沒爲澤歲星犯爲大水一曰出南爲旱熒惑守田不治客星犯水道不通伏兵在水中一曰客星若水火守犯百川流溢彗孛出爲大水爲兵穀不成流星入天下有水穀敗民饑赤雲氣入爲旱饑

四瀆四星在東井南垣之東江河淮濟之精也明大則百

川決

軍市十三星狀如天錢在參東南天軍貿易之市有無相通也中星衆則軍餘糧小則軍饑市空士卒離叛月入爲兵起五星入犯守軍糧絕天下以饑亂兵起客星入刺客起將離卒亾流星出爲大將出

野雞一星在軍市中主變怪出市外天下有兵守靜吉芒角動搖兵起五星入守若流星抵之將死兵散

丈人二星在軍市西南主壽考悼耄矜寡以哀窮人星亾人臣不得自通

子二星在丈人東主侍丈人側不見爲災

孫二星在子星東爲天孫侍丈人側相扶而居主孝慈不

見為災

關丘二星在南河南天子雙關諸侯兩觀也動搖宮中有變太白熒惑守兵戰闕下客星守為兵亦為有賊有奸臣彗孛出兵起天子不安其宮赤氣入宮中有火災

狼一星在東井東南為野將王侵掠王南夷盜賊芒角動搖則兵起明盛兵器貴色黃白為凶赤為兵一曰明盛海寇作亂動搖胡兵大起變色天下亂盜賊滿野有白芒人徒聚月犯有兵不戰一曰有水事五星犯兵大起多盜彗孛犯盜起赤雲氣入有兵

弧矢九星在狼星東南天弓也王行陰謀以備盜常屬矢以向狼武密曰天弓張則北兵起又曰天下盡兵動搖明大則多盜變色失常兵大起芒角躁怒四海兵變狼為寇盜弧司其失矢直狼則盜息矢不直狼為多盜引滿則天下盡為盜一曰弧矢動移不如常者多盜賊胡兵大起狼弧張害及胡天下乖亂客星入南夷來降出入之為兵出入流星入北兵起屠城殺將赤雲氣入民驚一曰北兵入中國

老人一星在弧矢南一名南極常以秋分之旦見於丙候之南郊春分之夕沒於丁見則治平天子壽昌不見則兵起歲荒君憂客星入為民疫一曰兵起老者憂流星犯老人多疾一曰兵起白雲氣入國當絕

輿鬼四星主觀察奸謀天目也為朱鳥之目一曰天廟東

北星主積馬東南星主積兵西南星主積布帛西北星主積金玉隨變占之中央星為積尸孛孛然色白如粉絮主灰喪祠祀一曰鐵鎖主誅斬鎖如星非星但氣而已故曰積尸氣欲其忽忽不明明則兵起動搖民疫水災以起兵人灰如麻月犯鬼軍將灰歲星犯穀傷民饑熒惑犯兵起入之賊在君側有兵喪填星守為旱太白入犯為兵亂臣在內一曰將有誅貫之而怒下有叛臣久守下有兵為旱為火辰星犯五穀不登客星犯國有自立者敗彗星犯兵起國不安星孛其下有喪兵起流星犯鬼鎖有戮灰者入則四方來貢

耀四星在鬼宿西北軒轅西主烽火備邊亭之警急以不明為安明大則邊有警動搖外兵大入亾不見戒在守候之官太白犯守邊警急

外厨六星在柳南天紀北為天子之外厨主烹宰以供宗廟占同天厨

天社六星在弧矢南昔共工氏之臣勾龍能平水土故祀之以配社其精上為星明則社稷安不明國危動搖則下謀上太白熒惑犯國易主守則有祠事於國內出之有祠事於國外彗出若入犯社稷再造

天紀一星在外厨南主知禽獸齒歲

柳宿七星天之厨宰也主尚食和滋味爾雅曰味謂之柳柳鶉火也又主木功又主雷雨一曰天大將軍一曰天庫

一曰枹爲鳥注主木草鳥喙朱鳥口也星明吉不明國失政開張人饑死不見都邑振動直則爲兵就聚兵滿野歲星犯國多義兵熒惑犯色赤大而芒角宮中憂火災守之有兵逆臣在側太白犯有急兵逆行勾已臣謀主晝見爲兵辰星犯歲旱客星犯色蒼白殺邊地諸侯彗星犯爲兵爲喪星孛於枹南夷叛

酒旗三星在軒轅右角南酒官之旗也主宴享飲食太白犯公卿有謀

星宿七星一名天都一曰員宮正于位赤帝府也主衣裳文繡又主急兵又主烽候明大吉暗小爲災動則兵起離則易政益天曰七星爲朱雀頸頸者文明之粹羽儀所承

歲星犯主憂兵五穀多傷熒惑犯橋梁不通逆行則地動爲火災出入畱舍其國失地水決太白犯兵暴起大臣爲亂經天防詐僞辰星犯賊臣在側守則其分有憂萬物不成兵從中起彗犯有亂兵起武密曰彗星出七星狀如杵爲兵星孛於七星有亂兵起宮殿流星犯爲兵憂又曰入則有急使來蒼白雲氣入貴人憂出則天子用急使赤入爲兵黃則遠人來貢

軒轅十七星在七星北后妃之主士職也一曰東陵一曰權星主雷雨之神南大星女主也次北一星夫人也屏也上將也次北一星妃也次將也其次諸星皆次妃之屬也女主南小星女御也左一星少民后宗也右一星太民太

后宗也欲其色黃潤而明大小有序其小星明與大星等
后宮乖爭妃妾僭奪移徙出外民流胡地移徙入內胡人
來民大饑武密曰后妃後宮之象陰陽交合感為雷激為
電和為雨怒為風亂為霧凝為霜散為露聚為雲氣立為
虹蜺離為背牆分為抱珥此一十四變皆權主之軒轅中
央土神黃帝之舍也彗孛犯女主為寇一曰兵起流星入
後宮多讒亂乙巳占流星出后有中使出

內平四星在中台南執法平罪之官明則刑罰平

天相三星在七星北酒旗南丞相大臣之象五星犯守后
妃將相憂黑雲氣入為將疾

天稷五星在七星南農正也取百穀之長以為號明則歲

豐暗或不具為饑移徙天下荒歉

張宿六星為嗥爾雅鳥張嗥郭璞云鳥受食之處也主珍
寶宗廟所用及衣服又主天厨飲食賞賚之事又主四國
貢方物之庫又主長養萬物星明大吉暗小為災不見貴
戚作亂移徙天下有逆就聚為兵月犯將相次熒惑犯功
臣當封入則兵起又曰色如四時休王其分貴人安社稷
無虞又曰熒惑春守諸侯叛逆行守為地動為火災又曰
將軍驚土功作又曰會則不可用兵填皇入為兵出則其
分失地太白犯國憂守之其國兵謀不成畱舍其國兵起
辰星犯守五穀不成兵起大水入為火災出則有叛臣客
星犯天子以酒為憂出入於張兵起國饑舍畱不去前將

軍有謀又曰利先起兵彗星犯國用兵民凶守爲兵出爲
旱又曰犯守君欲移徙宮殿星孛於張爲民流爲兵大起
蒼白雲氣入庭中觴客有憂黑爲其分水災色赤天子將
用兵

天廟十四星在張宿南天子祖廟也明吉微細其所有兵
軍食不通客星中犯兵起

太尊一星在太微旁占與斗北太尊同

翼宿二十二星爲鳥翼天之樂府主俳倡戲樂又主外夷
遠客負海之賓星明大禮樂興四國賓動搖則蠻夷使來
離徙帝將舉兵就聚天下相侵伐明盛芒動則王者用兵
征四方月犯國憂其分有兵大將凶歲星犯五穀爲風所

傷熒惑犯其分民饑邊兵起出入畱舍爲兵守之佞臣爲
亂填星出入畱舍兵起太白入犯皆爲兵起出入畱舍大
風水災舍左爲旱辰星守旱饑民流龍蛇見守其中兵大
起客星入犯國有兵一曰負海國有使來守之爲兵起彗
星犯國有兵喪星孛於翼大臣憂出則其地有謀下有兵
喪芒所指有降人流星犯出則其下有兵乙巳占曰流星
入天下賢士入見南夷來貢赤雲氣出入有暴兵

東甌五星在翼南主蠻夷天文錄曰東甌東越也星芒角
動搖蠻夷叛太白熒惑守其地有兵客星入蠻夷君長以
金玉來彗出蠻夷起亂

軫宿四星主冢宰輔臣主車騎主載任有軍出入皆占於

軫又主風占死喪明大則法駕備就聚則兵起動則車騎用轄二星傳軫兩旁主王侯左轄為王者同姓右轄為異姓星欲小而明去軫七寸若一尺為常遠軫凶明大與四星等兵大起轄進退車騎發復其所為兵罷有兵在外而轄遠軫亦為兵罷轄舉南蠻侵車無轄國有憂月暈而生背氣其下兵起城拔視背所向擊之勝歲星犯為兵災為民疫入則其國將死熒惑犯有亂兵入軫將軍為亂水傷稼民多妖言逆行為火為兵填星犯為兵入則兵敗出入舍留六十日兵起大旱太白犯兵起得地入為兵守之亾地將憂起左角逆行至軫失地經天則兵滿野辰星犯民疫守之大水入則天下以火為憂客星犯為兵為喪入則

有土功糴貴諸侯使來出則君使諸侯守之邊兵起民饑守轄軍吏憂彗星犯為兵喪又曰天子起兵星孛於軫亦為兵喪又曰下謀上流星犯有兵起亦有喪不出一年庫藏空春夏犯為金革用秋冬為水旱不調

長沙一星在軫宿中楚有長沙取此主壽命明則君壽長子孫昌明與軫四星等兵大起

軍門二星在青丘西天子六軍之門主營候設豹尾旗與南門同占明大芒角兵起星非其故及客星犯守皆為道不通

土司空四星在軍門南主土功主界域亦曰司徒均明吉微暗則稼穡不登遠人離叛天下亂太白熒惑守犯歲大

五事類
卷之一
一
饑兵大起客星犯守土功大作有兵災彗犯兵起民流
青丘七星在軫東南蠻夷之國號星明則夷兵盛動搖夷
兵爲亂流星入蠻夷來歸

器府三十二星在軫宿南樂器之府也明則八音和君臣
平不明則反是

步天歌 井八星橫列河中靜一星名鉞井邊安兩河各
三南北正天罇三星井上頭罇上橫列五諸侯侯上北河
西積水欲覓積薪東畔是鉞下四星名水府水位東邊四
星序四瀆橫列南河裏南河下頭是軍市軍市團圓十三
星中有一箇野雞精孫子丈人市下列各立兩星從東說
闕丘兩箇南河東丘下一狼光蓬茸左畔九箇彎弧弓一

矢擬射頑狼胸有箇老人南極中春秋出入壽無窮 鬼

四星册方似木櫃中央白者積尸氣鬼上四星是燿星天

狗七星鬼下是外厨六箇枹星次天社六星弧東倚社東

一星名天紀 枹八星曲頭似垂枹近上三星號爲酒宴

享大酺五星守 星七星如鈎枹下生星上十七軒轅形

軒轅東頭四內平平下三箇名天相相下稷星橫五靈

張六星似軫在星旁張下只是有天廟十四之星册四方

長垣少微雖向上星數歌在太微旁太尊一星直上黃

翼二十二星大難識上五下五橫著行中心六箇恰似張

更有六星在何處三三相連張畔附必若不能分處所更

請向前看野取五箇黑星翼下頭欲知名字是東歐 軫

四星似張翼相近中央一箇長沙子左轄右轄附兩星軍門兩黃近翼是門下四箇土司空門東七烏青丘子青丘之下名器府器府之星三十二已上便為太微宮黃道向上看取是

戎事類占卷之十一
終

戎事類占卷之十二

豫章李克家嗣宗甫輯
古歙胡文海鵬運甫校

星類六

凡天文在圖籍昭昭可知者經星常宿中外官凡百一十八名積數七百八十三星皆有州國官宮物類之象其伏見蚤晚邪正存亡虛實潤陜及五星所行合散犯守陵歷闕食彗孛飛流此皆陰陽之精其本在地而上發於天者也

凡五星木近日則遲遠日則疾火近日則疾遠日則遲土平行無太遲疾金水附日而行此大槩也

凡五星東行為順西行為逆超舍而前為盈退舍而後為縮又云失次上至三宿曰盈躁急之象也失次而下二三宿為縮畏退之象也 光而明滅不定曰動不安之象也

光明出生鋒曰芒 芒長四出曰角 長而偏出曰彗

芒謂之正旗正旗所指者受殃戰則順旗所指者勝

凡五星同度相及者曰合又曰相去一尺內曰合一曰同舍曰合 同宿曰聚亦謂之會一曰光芒相逮曰會 未

當去而去曰出未當來而來曰入一曰行而造其中曰入

入宿而緩曰舍一曰所居曰舍 入此宿曰宿一曰留

二十日以上曰宿 處其所曰居一曰依度至而不去曰

居 不東不西曰留 依其傍而居曰守一曰居之不去

曰守一曰徘徊不去其度曰守一曰居其宿曰守 行而

侵之曰犯一曰經過其星光芒及之曰犯一曰七寸以內

光芒相及曰犯又曰自下往觸之曰犯又曰相去五寸而

光芒不接亦輕若相去雖一尺以內而光芒相射亦以犯

占 先犯而後留之曰犯守 未當入度而經犯之曰侵

東西正當曰中自上而下壓之曰乘自下而直往上曰

凌一曰相冒過曰凌又曰突掩為凌 相冲而指曰觸一

曰兩動直前相抵曰觸一曰行而直前冲之曰觸 相凌

曰鬪一曰合而復離曰鬪一曰相擊曰鬪 東入西出曰

貫 相逼切曰磨 周之一匝曰環 環之不周曰繞

迫而侵之曰薄又曰相值相逼曰薄 勾者左去右回右

去左回如勾字之狀已者往而復還如已字之形一曰去而復回為勾繞之而去為已一曰東西為勾南北為已一曰形如勾曰勾如已曰已 刺者過其傍而光刺射之也 掩者當其所而滅其光也 食者侵其邊而漸及其中如蠶食葉之狀一曰星月相凌不見者則所食也 吞者從上直下掩之也 戴者頂之於上也 星食月者星襲月中月食星者月至星沒也 同光者二體相合不辯其孰為彼而孰為此也 經天者昏旦出於地木火土陽星不忌金水陰星經天則為妖也 晝見者白日出見與日爭光者也 李淳風曰聚者自三星以上為聚聚者積會之象福聚則吉刑聚則凶先至則吉後至則凶 從者經

歷次第相及於一也次第從就之象 離者雖同宿共度而南北乖隔不和之象也 徙者雖同在宿分不相倚待起行移去相避之象也 舍者經其宿而行遲也 宿者經其宿而過徑去不遲也 侵者越理而進以大迫小自上適下漸至損害也 凌者以小迫大直往凌之也 抵者一動一靜而直至其所也 歷者以次相及而過也 經者由其中過而無所犯也 貫者直經其中過也 兵出入之象 角者長大於芒興主誅伐之象也 大者大於本體興建開拓之象小者小於本體亾滅衰敗之象逆者違逆之象和者和順之象遲者徐緩之象疾者急迫之象

舍者二星相遇同處一宿之中和則吉逆而刑凶一

逆一順一遲一速相會於一宿之中為會德會則福興刑
會則禍作 留者久居其宿作興勃亂之象中者中傷之
象掩食主并吞滅亾之象乘凌主協迫暴橫之象戴者主
有所立也 自上墜下曰隕兵亂旱饑 自下而上曰升
君以火憂 橫飛而去曰矢兵災益甚 兩星從行曰同
舍奸邪謀逆 大而去速曰奔災禍急速 相去七寸以
裏曰合五寸以裏曰犯奸謀作逆 兩星相抵曰凌君危
民災 兩星相觸曰鬪兵起血戰 從行相及廬而復圓
曰襲陰謀暗害 當去復止曰守禍大災深 當去復還
曰留禍亂不息 當去反行曰逆禍難最凶 周匝不離
曰環繞禍害連綿 東西相繞曰勾南北相勾曰巳狀如

乙巳字樣乙巳周蔽其星不見曰掩如太陽掩星之類竝
主奸邪叛逆

一曰星晝見若星與日竝出名曰嫁女星與日爭光武且
弱文且強女子為王在邑為喪在野為兵二曰恒星不見
恒星者在位人君之類不見者象諸侯之背畔不佐王者
奉順法度無君之象也三曰星鬪星鬪天下大亂四曰星
搖星搖人眾將勞五曰星隕大星隕下陽失其位災害之
萌也又曰眾星墜人失其所也又曰當其下有戰場天下
亂期三年又曰奔星之所墜其下有兵又曰星隕如雨天
子微諸侯力政國有兵凶則星墜為鳥獸天下將亾則星
墜為飛蟲天下大兵則星墜為金鐵天下大水則星墜為

土國主凶有兵則星墜為草木兵起國亂凶則星墜為沙
星墜為人而言者善惡如其言又曰國有大喪則星墜為
龍 凡五星守犯列宿皆為凶咎若逆行或環繞勾已之
其禍尤大 凡五星有變則其精散為妖星
凡五星見伏留行逆順遲速應歷度者為得其行政合於
常違歷錯度而失路盈縮者為亂行亂行則為天矢彗孛
而有凶國革政兵饑喪亂之禍云

五星為五德之主其行或入黃道裏或出黃道表猶月行
出入有陰陽也終出入五常不可以筭數求也其東行曰
順西行曰逆逆則遲通而率之終為東行矣不東不西曰
留與日相近而不見曰伏伏與日同度曰合其留行逆順
掩合犯陵變色芒角凡其所主皆以時政五常五官五事
之得失而見其變

木火土三星行遲夜半經天其初皆與日合度而後順行
漸遲追日不及晨見東方行去日稍遠朝近中則留留經
旦過中則逆行逆行至夕時近中則又留留而又順先遲
漸速以至於夕伏西方乃更與日合金水二星行速而不
經天自始與日合之後行速而先日夕見西方去日前稍
遠夕時欲近南方則漸遲遲極則留留而近日則逆行而
合日在於日後晨見東方逆極則留留而後遲遲極去日
稍遠旦時欲近南方則速行以追日晨伏於東方復與日
合此五星合見遲速逆順留行之大經也昏旦者陰陽之

大分也南方者太陽之位天地之大經也七曜行至陽位
當天之經則虧昃留逆而不居焉此天之常道也三星經
天二星不經天三天兩地之道也

凡五星所出所行所直之辰其國為得位得位者歲星以
德熒惑以禮填星有福太白兵強辰星陰陽和所行所直
之辰順其色而有角者勝其色害者敗居實有德也居虛
無德也色勝位行勝色行得盡勝之

古歷五星之推亾逆行者至其氏石氏經以熒惑太白為
有逆行夫歷者正行也古人有言曰天下太平五星循度
亾有逆行日不食朔月不食望熒惑主內亂太白金主兵月
主刑內臣不治四夷不服兵革不寢刑罰不錯故二星與

月為之失度三變常見及有亂臣賊子伏尸流血之兵大
變乃出甘石氏見其常然因以為紀皆非正行也

凡五星為政歲緩則不行急則過分逆則占熒惑緩則不
入急則不出違道則占填緩則不還急則過舍逆則占太
白緩則不出急則不入逆則占辰緩則不出急則不入非
時則占五星不失行則年穀豐昌

凡五星同色天下偃兵百姓安寧歌舞以行不見災疾五
穀蕃昌

凡五星盈縮失位其精降於地為人歲星降為貴臣熒惑
降為童兒歌謠嬉戲填星降為老人婦女太白降為壯夫
處於林麓辰星降為婦人吉凶之應隨其象吉

營室為清廟歲星廟也心為明堂熒惑廟也南斗為文太室填星廟也亢為疏廟太白廟也七星為貞宮辰星廟也五星行至其廟謹候其命

五星分天之中積於東方中國大利積於西方夷狄用兵者利

凡五星所聚宿其國王天下從歲以義從熒惑以禮從填以重從太白以兵從辰以法以法者各以其事以法致天下也三星若合是謂驚立絕行其國外內有兵與喪民人乏饑改立侯王四星若合是謂大盤其國兵喪竝起君子憂小人流五星若合是謂易行有德受慶改立王者奄有四方子孫蕃昌亾德受罰離其國家滅其宗廟百姓離去

被滿四方五星皆大其事亦大皆小其事亦小

凡五星早出為羸羸為客晚出為縮縮為主人五星羸縮必有天應見杓

太白猶軍也而熒惑憂也故熒惑從太白軍憂離之軍却出太白之陰有分軍出其陽有偏將之戰當其行太白還之破軍殺將辰星殺伐之氣戰鬪之象辰星出東方太白出西方若辰星出西方太白出東方為格野雖有兵不戰辰星環繞太白若鬪大戰客勝主人吏死視其所指以名破軍

凡有軍謹候太白辰星出太白出辰星不出太白為客辰星出太白為主人出而與太白不相從野雖有軍不戰辰

星出太白不出辰星為客太白出辰星為主入一出不一
出為主客不備野有軍不戰其出也一東而一西不戰若
俱出一方而異宿軍雖相近不戰必合宿乃戰相凌乃有
大戰 太白辰星俱出東方不相近二十日至三十日辰
星入東方南國有兵不戰至春夏兵起 辰星太白俱出
西方不相近二十日至三十日辰星不入西方北國有兵
太白辰星同出東方皆赤而角中國大敗 辰星隨太白出東
方天下無兵兵起期六十日太白出辰星北客勝辰星出
太白北主人勝 辰星太白俱出東方色黑外國利中國
不利 辰星隨太白出西方天下有兵不戰亦不解辰星

居其前兵罷若抵太白環繞之居西北陰國兵起居西南
陽國兵起期半年兵在外必戰利客不利主人 太白隨
辰星出西方無兵兵起期六月有兵客利相近去可四尺
客益利不戰則兵未解辰星入則兵罷 太白出東方辰
星居其前不去至十五日若二十日而入陰國兵滅不戰
辰星出西方居太白前不去十五日若二十日而入陽
國兵滅去則兵罷 太白出東方若西方辰星居其後二
十日兵起辰星居其前十五日兵罷辰星歷太白左小戰
歷太白右數萬人戰主人吏死辰星過太白右三尺軍急
約戰出太白北小戰主人勝出太白南大戰 辰星過太
白其間可容劍小戰客勝居太白前三日軍罷出太白左

小戰出其右大戰辰星來抵太白不去將死正其上出客
勝下出客敗 太白辰星相遇太白避之客強主人畏死
太白出辰星右而居其前主人利逐入主人大利 辰星
迫太白主人強客畏主人辰星出太白右而居其前客利
逐去入之主人不利客大利 辰星入太白中五日乃出
及入而上出破軍殺將客勝下出客敗 太白與辰星合
太白居右辰星居左主人勝辰星居右太白居左客勝
天下無兵辰星在東方若西方居太白前水中兵有滅者
太白辰星俱出西方辰星居太白前相近間可容劍在
西北陰國有兵謀以戰主人勝在西南陽國有兵謀以戰
則客勝 太白辰星合在西南南國之事在西北北國之

事上南為中國之事

凡五星至二星相合聚間火失光為兵喪為旱木失光人
主惡之土失光女主惡之金失光兵起亦為喪水失光為
大水以日占之 五星相聚逆行者其事逆臣奪主國
五星聚而鬪天下大戰寇賊竝起民庶流離夷狄內主
五星聚惟土星有芒角者所舍之國大凶

凡五星歲與填合則為內亂與辰合則為變謀而更事與
熒惑合則為饑為旱與太白合則為白衣之會為水 太
白在南歲在北名曰牝牡年穀大熟太白在北歲在南年
或有或亾 熒惑與太白合則為喪不可舉事用兵與填
合則為憂主孽與辰合則為北軍用兵舉事大敗 填與

辰合則將有覆軍喪師與太白合為疾為內兵 辰與太白合則為變謀為兵憂 一曰火與水合為淬與金合為鏢不可舉事用兵 土與金合國凶地與木合則國饑與水合為雍沮不可舉事用兵有覆軍

木火土合在一舍為旱饑有土功 一曰國分相去三尺以內守七日以上天下兵起五穀大傷人相食七寸以內名曰芒交臣弑其君期八十日 火土水合女子為天下害大臣逆 木金土合其國兵起不戰 木土金參會同舍相去三尺兵起大戰相去七寸以內曰芒交外內構謀弑其君 火土金合天下有大謀 木火金合殺大將天下皆有兵三王鼎足其分國凶 金水土合其國將戰不勝

凶地 火水水合用事者當之天下開牢大赦

木火二星合為更政革命其分有兵君憂人愁歲星熒惑陽也太白辰星陰也陽主中邦陰主外邦陰與陽合中外連兵陽與陽合兵謀在中國陰與陰合兵謀在外國又曰相近曰犯其殃大相遠曰合其殃小 木與火合為饑為旱一曰大臣匿謀有反者主凶地國有水一曰為內亂臣謀主戰北軍困 木火合相去七寸以下光芒相及臣害君一曰火木同舍相去三尺以內相守七日以上其國有反臣五穀傷民不安期其年二尺以內相守七日至二十日兵起國滅內戚相殘期一百八十日 木火合而相守其國君憂守十日以上穀貴人作亂火在木北有軍大戰

火在木南偏將戰客軍憂 水火合於一舍火在木上名曰子母同光其國大強留之百日不變色失次其國且以重德致天下 水火合於宿之陽母子同鄉其國安合於宿之陰兵起 水火同行疾兵從之戰不勝 熒惑當出見而近歲星出其北天下有急兵出其南有匿謀在其中 水火接芒與東方宰相亂人主計不定不出三年大兵起 水火接芒與西方國有憂明年春失農時 水火合色俱青為疾赤為兵黃旱白喪黑饑芒角接人死殆盡 水火再合有走王再合者東行已合西行又合也 水土合為內亂為饑為變謀更事人主失勢 水土合其分戰不勝凶地主死 水土合井泉高而平原出雲歲不

登有大水又曰天下易主民流千里魚鼈陸死民苦盜賊其分國不可戰戰必敗 水土合相守十日則天降禍不義者受其殃 木與土合一舍木在下土在上名曰雌雄間客軍大敗主人勝六十日不下有空國徙王 水土同舍相去三尺以內相守二十日以上國更主天下大爭大臣相仇天子易統天下存亡者半 水土合有兵相守土在木下利客土在木上利為主人 水土同出其宿國凶地同入其宿國得地 水土皆出東方夕入西方百九十日皆正中者兵發東方之國勝當入不入反東行九十日正中者當發兵主死民流亡 木金合為水為饑為疫光芒相接有兵兵戰殺大將無兵

亂起或曰有軍則先起者勝金在木南以兵饑金在木北以水饑皆有亾國 木金同光大戰殺將不同光兵起不戰 金木同在一舍其年有蝗蟲生 木金同舍相去一尺天下有兵不出四十日必戰星色青東方勝色赤南方勝色黃中央勝色白西方勝色黑北方勝 木金合相去五尺有兵戰三尺有破軍二尺有拔城一尺治兵光芒相接大戰無兵在外則兵大起 木金合相去三尺相守七曰以上將軍誅死 木金合三尺內七寸以外木出金左有爭出金右年饑 金在南木在北名曰牝牡相承年穀大熟金在北木在南歲困有亾國 木金合於東方木在北金在南陰陽合為年豐木金合於西方木在金位名曰

伐其國凶 金木俱出東方若併入西方王者亾地 木金相遇有兵兵罷無兵兵起乍東乍西有逐相 太白出歲星北客勝歲星出太白北主人勝 歲星隨太白出於西方光怒必戰破軍殺將若環繞之有次王無兵在外則兵起相走 金木一東一西害侯王一南一北兵自伏 金木合金從木疾主人急木從金疾客急 木水合為變謀更事其國多水民饑 水木合為內亂有軍在外不利先起者若相守七日至四十日人流亾芒相及則外與內謀其君 木水合一曰將死光芒相接天下水泉湧出 火土合國憂主走為內亂為兵一曰大旱一曰女子為天

下害一曰主憂兵起又曰其下失地有破國一曰其國不可舉事用兵又曰火土所合宿國饑戰不勝 火土合火去而復來環繞之不出六年國亡 火土合土在火上名曰逆其國防外兵土在火下各不動名子母同光其國得地益強若同上下民有逆心兵起更王一曰土在火上光芒相接女主憂 火土合火入土光中將相憂

火金合金在火上所在之國且以義致天下一曰金居火上其國用兵三十日不去天下三年起兵六十日不去其下有空國 金先居火上而復出火下其國有反臣 金在火左右其國必大敗 火在金前後左右成戰客勝 金在火東無兵兵起不出三月 火金合火入金光芒中

火在南大旱戰則小將死火在北為水 火與金合金從火有兵兵罷火從金兵大起火從金而金無光火赤而光所入宿受兵國亡 火隨金行七日以上追及金相去尺以下大臣死其分旱其國受兵戰敗亡地一曰金火相隨而行所入宿國君死人饑流亡道上多死人有亡國 火金合而金起芒角居火上其國用兵戰勝 火入金出其陰不有分軍必有他急

火與水合有軍在外不利先起者一曰火水合大旱赤地千里國主走秋合有兵冬合有喪 火水合於東方臣謀主一曰水火合於東方水色白而大兵在外割地為和從前國大病從旁小病 火與水合在他時為卒在冬為刑

水火同行若不有兵疾疫流行火經水命曰自伐不可
用兵必有大敗覆其國家以及其君凶

土與金合為喪為內兵國亾地相守數十日不去后有內
亂 土在金南一尺女主用事在金北一尺女主死若行
去宿遠君不立后 金土合金在土南年穀大熟金在土
北歲偏無 土金同宿金在土上不出二月有兵民流
土金合為水土在金北去之七寸母子同光其歲大豐
金土合土色青多死喪赤為兵黃為旱

土水合為變謀更事又為旱為陰謀有兵為將戰其分將
軍死敗無兵為內亂

金水合為兵憂為變謀為邊兵戰 金水同出東方東方

有兵同出西方西方有兵 金水竝出東方利舉兵西伐
東軍勝金水竝出西方利舉兵東伐西軍勝金水俱出東
方或俱出西方客主相見有兵必戰無兵兵起

凡歲熒惑太白填四星與辰鬪皆為戰兵不在外皆為內
亂 木與金鬪有大兵一曰國有內亂野有破軍又曰無
兵兵起有兵兵戰又曰其國旱饑不可舉兵又曰夷狄內
侵有易相又曰人流徙有亾國一曰兵在外為亂戰敗一
曰相為亂有滅諸侯民多死亾有土功 木金鬪於東方
有兵在外必戰鬪於西方有亾國死王又曰其年八月兵
起流血 木火合鬪殺大將 木與土鬪不出其年王者
亾地將軍死之一曰其國先起兵者敗一曰天下哭泣相

望期六十日又曰有易相又曰星色青為喪赤為旱白為兵黑為水黃為土功 木與水鬪有兵在外則戰無兵為內亂將死一曰有亾國不出三年 木與金鬪其野有破軍殺將一曰有戰兵不在外而在內大戰將死歲大饑 金木合鬪有大兵 金火春鬪其歲旱夏鬪內主易秋鬪兵大起冬鬪女喪王者憂將軍死 火與水鬪國以暴敗一曰女為天下害又曰火水鬪於東方臣伐主鬪於西方宮中有亂一曰火水鬪將死其野有大水 火與土鬪其國子弟為亂一曰不出其年有亾國一曰有叛臣作亂兵起一曰王者亾地將軍死之一曰其下國有圍邑 木與金鬪期九十日憂王者亾地一曰有兵喪更立侯王一曰

臣謀王兵起 土與金鬪東方臣伐君鬪西方強國官中有亂一曰女主為亂皆期九十日 金與水鬪其國內亂兵起軍在外者破大將死一曰先起兵者凶若環繞之大將戰一曰不出其年有改王一曰有反臣一曰金水鬪其分國大旱一曰有大戰無兵在外則兵起一曰金水相遇而鬪辰星不勝燕趙代有憂太白不勝秦有憂不勝者其光分散或歛芒失色皆為不勝 土與水鬪軍在外則戰有死將無軍為內亂兵起一曰水土鬪關梁不通

歲星犯熒惑為旱為饑有兵大戰 歲星觸熒惑其國亂 歲星食熒惑不出三年國亾 歲星守填星大臣相滅天下交爭一曰有兵戰主人吏死其國大穰一曰水土交

行必有破傷 歲星與填星守其地有王者興除舊布新
 歲星犯太白有兵大戰一曰相死大臣黜女主喪一曰
 其分草再生將軍誅無將軍則不出四十日有拜將 歲
 星乘太白有戰偏將死 歲星觸太白四夷來侵 歲星
 守太白蠻夷叛四序不順陰陽爽和 歲星犯辰星有兵
 太子憂一曰民多病洩 歲星掩辰星有兵戰客將死滅
 之殺大將貫之薄之殺偏將觸之主人病 歲星守辰星
 主憂有賊水退國不安水退賊敗
 熒惑犯歲星冊太子有赦一曰有兵戰一曰大臣有匿謀
 一曰蟄蟲冬出雷早行禾不成一曰有戰火在木北天下
 急出其南有謀在中一曰奸臣為謀殺大將 熒惑守歲

星太子憂一曰大赦守後火入三度其國大敗退三度賊
 敗火貫木殺小將 熒惑犯填星兵起大戰一曰女主當
 之或曰火犯土土在下火在上其國吉土在上火在下大
 臣憂一曰火犯土為旱 熒惑觸填星有兵主病火入土
 將軍為亂 熒惑守填星旱兵起一曰殺太子有內賊王
 者亾城守後火入三度國不安退三度則無咎 熒惑犯
 太白主亾天下憂兵起大戰金在南南國敗在北北國敗
 熒惑乘太白兵雖起不用其國且以武致天下 熒惑
 觸太白有暴賊 熒惑經太白軍憂離之軍却 熒惑從
 太白下上抵之不入軍急不戰 熒惑出太白陰有分軍
 出其陽有偏將戰主人軍敗若環繞太白偏將死 熒惑

入太白中上出破軍殺將客勝出太白左左軍勝出太白
右右軍勝 熒惑入太白將戮入久不出國亂主憂 熒
惑環太白成勾已大將死 熒惑抵太白不入亦不出客
將死 熒惑摩太白而過有數萬人戰有破軍主人將死
熒惑薄太白主人不利凶偏將 熒惑襲太白兵起相
易一曰軍凶 熒惑犯太白主不安守其北太子憂守其
南庶子憂守後入三度國大敗退三度災消一曰火金相
守流血滿野 熒惑犯辰星其國不可舉事用兵一曰野
有兵不戰一曰兵在外者敗 熒惑觸辰星有異姓者王
熒惑守辰星太子憂有赦守後入三度大兵聚其下退
之水災

填星犯歲星內亂一曰其野有兵相攻 填星守歲星有
兵守後木退歲歉土退年豐有賊 填星犯熒惑大人忌
之若二星皆色赤或俱無光或土在火芒內火在土芒內
皆為其國大人死旱潦災物不成 填星犯太白為兵一
曰大水草木死 填星犯辰星為旱為變謀更事一曰將
有危一曰土犯水冬雷虹出來年夏寒隕霜雨雹
太白犯歲星王者有賊一曰為饑期三年一曰兵起為旱
一曰草木再生再死一曰金出木北客利木出金北主人
利 太白犯歲星環繞之若并光有兵戰破軍殺將一曰
太白環繞歲星有凶王 太白襲歲星君敗死 太白犯
熒惑主病有兵大戰客敗太白在南南國敗在北北國敗

東西亦如之 太白乘熒惑客軍敗隨之君憂 太白觸
 熒惑內有賊臣 太白守熒惑太子憂其間容指血流滿
 野若火退殺太子金退賊動 太白貫熒惑主人凶偏將
 死 熒惑方行太白環之有破軍殺將 太白犯填星太
 子不安國有咎 曰五穀不熟國饑人流 太白觸填星
 主憂 曰人主放恣大臣相殘賊兵起 太白守填星太
 白在鎮北天子失地守後太白退臣憂填退主憂有賊
 太白犯辰星國不安兵起 曰金水相犯西方有人東方
 大虛殃及匹夫 太白觸辰星殺宰相 太白守辰星國
 憂辰星先退有異姓者王 太白來守辰星旬日不去客
 將死

辰星犯歲星其國外野不安 辰星守歲星天非時降霜
 辰星犯熒惑上妨太子下妨太尉司馬 辰星觸熒惑
 太子不安若離而復合大水漂山人主哭於宮 辰星守
 熒惑天下多死喪疾疫兵起 辰星犯填星夏寒妨女主
 一曰春多雨水 辰星守填星夏霜春多雨 辰星守
 太白為變謀為兵憂守之旬日不去主人兵不利將死
 辰星犯太白兵起大戰破軍殺將辰星在上客勝在下主
 人勝

天	氣	之	清	濁	由	乎	地	之	陰	陽	之	交	感	而	成	也	故	天	有	四	時	地	有	五	土	人	有	五	德	此	五	土	之	德	也
---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---



